

verborumque cortice, sed in efficaci agnitæ veritatis exercitio, virtutisq; nucleo, positam esse. Sive contemplemur Eruditionem, ut diximus, secundariam; neque hæc citra hujus medii usum verè acquiri poterit. Nam ratio sibi soli relicta rerum omnium genuinum finem aut non perspicit, aut perspectum, si alienis non sufficiatur adjumentis, assequi nequit, & insuper, clariori lumine non præeunte, ad levem dubii ventum instar folii cespitat, errorumque cassibus incidens ita sœpe constringitur, ut vel nunquam, vel difficulter eluctari valeat. Testabatur id olim Ethnicis credita naturæque lumini absurdissima πολυθεότης: conspirant hodie in assensum tot testes, quot opiniones indeoque ortæ contentiones. Tandem quoque ratio in eruditionis usu mirum quantum cœca sit. Sæpe enim, qui cum subtilissimi ingenii præstantiâ stupendam doctrinam atque prudentiam conjunctam habent, eâ non raro in accelerandi sui ipsius exitii instrumentum utuntur, uti nec nostræ ætati hujus notæ exempla sunt ignota.

§. 35. Qui igitur Numinis auxilium sibi conciliat piis precibus, ab eo, qui solis naturæ viribus innixus studet, in eo differt: 1. majori pollet perspicaciâ in rebus etiam naturæ obviis; 2. sedulitatem ipsius divina semper comitatur benedictio; 3. majori circumspectione ipsa studia dirigit, omniaque, quæ ingenii vires depascunt, diligentius evitat; 4. tandem quoque molestias in studiis passim obvias divinæ gratiæ solatio lenit, & metam præfixam excitatius urget.

§. 36. Secundum medium generali vocabulo dicitur *Industria*, quæ vero in diversas partes abit. Evidem si ad ipsa Eruditionis initia & quasi incunabula recurrimus, existimamus, ipsam olim sola *Meditatione* fuisse acquisitam. Admodum enim probabile est, Adamum rerum naturalium obliuitu raptum in admirationem de singularum naturæ investigandâ serio cogitavisse, ut vel inde patet, quod agrum coluisse dicatur. Nisi addere quoque velimus *Auscultationem*; quoniam ipse Deus Præceptoris munere functus, ipsi & miseriam, quam lapsu incurrerat, & redemptoris adventum graviter manifestavit. Cœterum absurditatis ungvibus facile se produnt, tum nugæ Isaaci Peyrerii, qui Præadamitas somniatus, Adamum quodam Samboscer, Præceptore usum fuisse ait, tum Rabinorum commenta, quibus quidam Angelus Raziel dictus primus Adami informator audit.

§. 37. Hoc